



საქართველოს გაერთიანებული სახელმწიფოს და სოფლის მეურნეობის მინისტრი

ბრძანება N 2-782

02/09/2020

ქ. თბილისი

ხობის მუნიციპალიტეტში შპს „ინერტული მასალების“ სასარგებლო წიაღისეულის (ქვიშა-ხრემის) გადამამუშავებელი საწარმოს მოწყობასა და ექსპლუატაციაზე სკრინინგის გადაწყვეტილების შესახებ

შპს „ინერტული მასალების“ (ს.კ. 405368178) მიერ, გზშ-ის ჩატარების საჭიროების დადგენის მიზნით, საქართველოს გარემოს დაცვისა და სოფლის მეურნეობის სამინისტროში წარმოდგენილია ხობის მუნიციპალიტეტში, სოფ. საჯიჯაოში, სასარგებლო წიაღისეულის (ქვიშა-ხრემის) გადამამუშავებელი საწარმოს მოწყობისა და ექსპლუატაციის სკრინინგის განცხადება.

წარმოდგენილი დოკუმენტაციის თანახმად, შპს „ინერტული მასალები“ გეგმავს ხობის მუნიციპალიტეტში, სოფელ საჯიჯაოს მიმდებარე ტერიტორიაზე, კომპანიისავე საკუთრებაში არსებულ არასასოფლო-სამეურნეო დანიშნულების მიწის ნაკვეთზე (ს/კ 45.12.27.190) სასარგებლო წიაღისეულის, კერძოდ ქვიშა-ხრემის, სამსხვრევ-დამხარისხებელი დანადგარის მოწყობასა და ექსპლუატაციას. აღნიშნული ნაკვეთიდან უახლოესი საცხოვრებელი სახლი დაშორებულია დაახლოებით 1000 მ-ით, საპროექტო ტერიტორიას ესაზღვრება სასოფლო-სამეურნეო დანიშნულების მიწის ნაკვეთები, ხოლო დასავლეთით, დაახლოებით 300 მეტრში, მდებარეობს მდინარე ხობისწყალი.

სკრინინგის განცხადების თანახმად, ტერიტორიაზე იგეგმება GAYRET MAKINA GMI 1110 მოდელის დანადგარის განთავსება. აღნიშნული დანადგარი შედგება ინერტული მასალების მიმღები ბუნკერის, სამსხვრევი დანადგარის, დამხარისხებელი დანადგარის მიმღების, დამსხვრეული ინერტული მასალის დამხარისხებლისა და 4 ერთეული ლენტური ტრანსპორტიორისგან. საწარმოში თავდაპირველად მოხდება ბალასტის თვითმცლელებით შემოტანა და მიმღებ ბუნკერში მიწოდება, საიდანაც მასალა გადაინაცვლებს ჰორიზონტალურ საცერში, ხოლო შემდგომ - გამრეცხ დანადგარში. საცრიდან ქვიშაგამოცლილი მასალა გადავა სამსხვრევ დანადგარში, ხოლო შემდგომ დამსხვრეული მასალა გადაადგილდება ჰორიზონტალურ საცერზე, გაირეცხება და დახარისხდება სხვადასხვა ზომის ფრაქციებად. სასარგებლო წიაღისეულის შემოტანა განხორციელდება მუნიციპალიტეტში არსებული სხვადასხვა კარიერიდან. საწარმო იმუშავებს წელიწადში 300 დღე, დღეში 8 საათიანი სამუშაო გრაფიკით და სველი წესით გადამამუშავებს 432 000 ტონა ნედლეულს, რის შედეგადაც მიიღებს 410 000 ტონა მზა პროდუქტს სხვადასხვა ფრაქციების სახით (ქვიშა - 0,6; ღორღი - 5-10; 10-20).

საწარმოში წყლის მოხმარება მოხდება საწარმოო და საყოფაცხოვრებო დანიშნულებით. სასმელი წყლის შემოტანა იგეგმება ბუტილიზირებული ფორმით. საწარმო საათში მოიხმარს 80 ტონა წყალს, რომლის აღებაც მოხდება მდინარე ხობისწყლიდან (წყალაღების

კოორდინატები: X – 745354, Y – 4694768). სამსხვრევ-დამხარისხებელი დანადგარის განთავსების ტერიტორიაზე მოეწყობა სამკამერიანი სალექარი, საიდანაც გაწმენდილი წყალი ჩაშვებული იქნება მდ. ხობისწყალში (წყალჩაშვების კოორდინატები: X – 745028, Y – 4694568). ობიექტზე აგრეთვე დაგეგმილია პერსონალისათვის საკანალიზაციო ჭის მოწყობა, საიდანაც დაგროვილი ფეკალური მასების გატანა მოხდება საასენიზაციო მანქანების საშუალებით, შესაბამისი სამსახურების მიერ.

წარმოდგენილი დოკუმენტაციის თანახმად, საყოფაცხოვრებო ნარჩენებისათვის ტერიტორიაზე დაიდგმება შესაბამისი კონტეინერები. ნარჩენების გატანა მოხდება შესაბამისი კომუნალური სამსახურის მიერ, მათთან გაფორმებული ხელშეკრულების საფუძველზე. ობიექტის ტერიტორიაზე სახიფათო ნარჩენებისათვის განთავსდება ჰერმეტიკული კონტეინერი და საჭიროების შემთხვევაში, სახიფათო ნარჩენების გატანა მოხდება შესაბამისი ნებართვის მქონე კომპანიის მიერ. სასარგებლო წიაღისეულის რეცხვის შედეგად სალექარში წარმოქმნილი ლამი დროებით დასაწყობდება ობიექტის ტერიტორიაზე, ხოლო შემდგომ გატანილი იქნება სარეალიზაციოდ.

საწარმოს საქმიანობის სპეციფიკიდან გამომდინარე, მოსალოდნელია ატმოსფეროში მავნე ნივთიერების - არაორგანული მტვრის გაფრქვევა. გაფრქვევები მოსალოდნელია ინერტული მასალების მიღების, შენახვისა და გადამუშავებისას. აგრეთვე ინერტული მასალის საწყობებიდან. საწარმოში აღრიცხულია დაბინძურების 6 წყარო, რომელთაგანაც მოსალოდნელია წლიურად 2,681 ტონა არაორგანული მტვრის გაფრქვევა. სკრინინგის ანგარიშის თანახმად, სასარგებლო წიაღისეულის გადამუშავება მოხდება სველი მეთოდით, ხოლო წიაღისეულის გადამამუშავებელი დანადგარი აღჭურვილი იქნება მტვერდამჭერი ციკლონით, შესაბამისად, უზრუნველყოფილი იქნება არაორგანული მტვრის მაქსიმალური დაჭერა. საპროექტო ტერიტორიის სიახლოვეს სხვა, ანალოგიური ტიპის საწარმო არ ფუნქციონირებს, შესაბამისად, კუმულაციური ზემოქმედება მოსალოდნელი არ არის.

საწარმოს ფუნქციონირებისას უარყოფითი ზემოქმედება მოსალოდნელია ტექნიკის ან სატრანსპორტო საშუალებებიდან ნავთობპროდუქტების ავარიული დაღვრის შემთხვევაში. სკრინინგის განცხადების თანახმად, ავტოსატრანსპორტო საშუალებების გამართვა არ იწარმოებს ობიექტის ტერიტორიაზე, ხოლო რისკების შემცირების მიზნით განხორციელდება ტექნიკისა და ტრანსპორტის მუშაობის პროცესის მეთვალყურეობა.

სკრინინგის განცხადების თანახმად, საპროექტო ტერიტორია თავისუფალია მცენარეული საფარისაგან, წარმოდგენილია ქვიშა-ხრემოვანი მასალით და შესაბამისად, არ არსებობს ნიადაგის ნაყოფიერი ფენის მოხსნის საჭიროება. პროექტის განხორციელების ეტაპზე ასევე არაა მოსალოდნელი ბიომრავალფეროვნებაზე ზემოქმედება. საწარმოს მიმდებარედ არ ფიქსირდება კულტურული მემკვიდრეობის ძეგლები.

საწარმოს მუშაობის პროცესში, სასარგებლო წიაღისეულის გადამუშავებისას, ტექნოლოგიურ პროცესში გამოყენებული სამსხვრევ-დამხარისხებელი დანადგარებიდან მოსალოდნელია ხმაურის წარმოქმნა. საწარმოს განთავსების ადგილისა და უახლოესი დასახლებული პუნქტის საპროექტო ტერიტორიიდან დაშორების მანძილის გათვალისწინებით, მოსახლეობაზე ხმაურით გამოწვეული მნიშვნელოვანი ზეგავლენა მოსალოდნელი არ არის.

სკრინინგის განცხადების მიხედვით, საპროექტო ტერიტორიაზე ნედლეულის ტრანსპორტირება დაგეგმილია არსებული გზის გამოყენებით, შესაბამისად არ არსებობს დამატებით ახალი გზების მოწყობის საჭიროება. წარმოდგენილი დოკუმენტაციის თანახმად, დღეში დაგეგმილია 5-6 სატრანსპორტო ოპერაციის შესრულება. რაც შეეხება, სატრანსპორტო გადაადგილებით გამოწვეულ ზემოქმედებას ატმოსფერულ ჰაერზე,

ავტოსატრანსპორტო საშუალებები იქნება ძარაგადახურული, რათა თავიდან იქნას აცილებული ასეთი ტიპის ზემოქმედება. ამასთანავე, დასახლებული პუნქტის არარსებობის გამო, ავტოსატრანსპორტო საშუალებების გადაადგილების დროს ხმაურით გამოწვეული ზემოქმედება იქნება მინიმალური.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება გამოქვეყნდა სამინისტროს ოფიციალურ ვებგვერდზე და ხობის მუნიციპალიტეტის მერიის საინფორმაციო დაფაზე. საზოგადოების მხრიდან აღნიშნულ საქმიანობასთან დაკავშირებით წერილობითი შენიშვნები და მოსაზრებები არ ყოფილა წარმოდგენილი.

წარმოდგენილი სკრინინგის განცხადებით დგინდება, რომ სასარგებლო წიაღისეულის (ქვიშა-ხრეში) გადამამუშავებელი საწარმოს მოწყობა-ექსპლუატაციას, ადგილმდებარეობისა და წარმოების სპეციფიკის გათვალისწინებით, გარემოზე მნიშვნელოვანი ზემოქმედება არ ექნება.

ზემოაღნიშნული კრიტერიუმების გათვალისწინებით, ასევე „გარემოსდაცვითი შეფასების კოდექსის“ მე-7 მუხლის მე-6 ნაწილის და ამავე კოდექსის II დანართის მე-5 პუნქტის 5.1 ქვეპუნქტის საფუძველზე,

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, რომ ხობის მუნიციპალიტეტში, სოფ. საჯიჯაოში, სასარგებლო წიაღისეულის (ქვიშა-ხრეშის) გადამამუშავებელი საწარმოს მოწყობა და ექსპლუატაცია არ დაექვემდებაროს გარემოზე ზემოქმედების შეფასებას;
2. შპს „ინერტული მასალები“ ვალდებულია „გარემოსდაცვითი შეფასების კოდექსის“ მე-7 მუხლის მე-8 ნაწილის შესაბამისად უზრუნველყოს გარემოსდაცვითი ტექნიკური რეგლამენტებით დადგენილი მოთხოვნებისა და გარემოსდაცვითი ნორმების დაცვა;
3. ბრძანება დაუყოვნებლივ გაეგზავნოს შპს „ინერტულ მასალებს“;
4. ბრძანება ძალაში შევიდეს შპს „ინერტული მასალების“ მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში გადაწყვეტილება განთავსდეს სამინისტროს ოფიციალურ ვებგვერდზე და ხობის მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი